

吳文節公遺集

吳文節公遺集卷二十二

目錄

舊引改配新綱片

各屬被水情形摺

籌運米糧摺

商米免稅片

動碾倉穀平糶片

撫卹災民並籌款備賑摺

請改撥雲南甘肅銅本兵餉片

暫開捐賑事例摺

暫停船工片

吳文節公遺集卷二十二

男養原謹編

奏議

舊引改配新綱片

再據運司蔡瓊詳稱竊照兩浙歷年滯銷額引前經查明截至道光二十七年止除有關經費應行待徵待補之款酌留二十六七兩年分截引六十萬道查照道光元年前撫

臣帥承瀛

奏案分綱帶運並十四年以前積引改餘未經銷竣之六十三萬道分別照舊辦理外餘俱詳請

奏明咨部繳銷以清綱分在案惟本年夏掣引鹽早經飭場開捆杭嘉紹三所商人已將所領舊引陸續捆配運所待掣查戊申綱新引應歸本年年底造報

奏銷必須截清舊引專配新綱方不致銷舊積新仍前套搭且於

奏銷課額可期無誤茲通盤籌議請將二十七年以前已捆未掣各綱舊引卽於此次夏掣一律改配戊申新綱仍照例由場驗截概令赴所就近核辦至所捆各綱舊引業已在場蓋印截角未便復准捆配容俟杭嘉紹三所掣畢後由司截清綱分引數歸入積引案內分別

彙請咨部繳銷等情詳請附

奏前來臣復加察核無異除飭司速將各綱舊引趕緊

截清綱分引數分別詳請咨部繳銷以清綱分外謹附
片具

奏伏乞

聖鑒謹

奏道光二十九年五月十一日奏奉

硃批戶部知道欽此

各屬被水情形摺

奏爲浙省雨水過多各屬被淹情形恭摺奏

聞仰祈

聖鑒事竊照浙省地方前因春夏以來雨多晴少梅水過多五月初旬復連朝大雨秧苗受傷經臣設壇祈晴緣由已於

奏報閏四月分雨水糧價摺內陳明在案茲五月中旬又疊遭大雨連宵達旦江河增漲溝渠漫溢省城內外地勢稍低之居民宅舍以及驛路田畝悉被水淹禾苗朽壞並據杭州府屬之海甯錢塘仁和富陽餘杭新城嘉興府屬之嘉興秀水嘉善海鹽石門桐鄉湖州府屬之烏程歸安德清長興武康紹興府屬之山陰會稽餘

姚嚴州府屬之建德淳安桐廬遂安壽昌分水等州縣
紛紛稟報被水情形與省城大畧相同兼之氣候甚涼
不獨低田被淹之苗業已損壞無救卽間有高田未淹
之禾亦難於長發臣日夜憂思寢食不安連日仍率同
司道等朝夕步禱惟冀卽日晴霽水勢迅速消退尙可
補種晚禾或栽植雜糧以望秋收無如自閏四月十六
以來一月有餘其間或稍霽半日或畧住片時旋復傾
盆如注以致積水未退新漲復增現尙陰雲密布雨勢
未已節氣已逾小暑尙未能得暢晴臣心實深焦灼雖
水係積漸漲溢被淹居民得以隨時遷避未致傷損人

口惟糧價日漸增昂低鄉房屋水浸日久半多傾圮無處棲止情形實爲可憫此皆臣供職無狀行政乖方以致召災病民咎無可追除飭司委員分赴各屬會同地方官確切查勘有情形最重者先行酌量撫卹或勸紳富各就各地量加賙濟一面勸諭農佃人等一俟天氣晴霽卽將田間積水設法宣洩疏消相機補種並隨時察看成災輕重再行

奏報外所有現在被水情形臣謹會同閩浙總督臣劉韻珂恭摺具

奏伏乞

皇上聖鑒謹

奏道光二十九年五月二十日奏奉

硃批速行妥辦刻不可延欽此

籌運米糧摺

奏爲籌運米糧以濟民食恭摺

奏祈

聖鑒事竊照浙省杭州嘉興湖州嚴州紹興等府所屬
地方因閏四月十六以後疊遭大雨江河漲溢據該州
縣稟報居民田廬被淹情形業經臣恭摺具

奏並委員分赴各屬確切查勘妥爲安撫惟糧食一項

最關緊要浙江本省產米雖豐年亦難自贍全賴外江客販運至海甯州長安鎮米市源源接濟今因外江水大價昂客販到浙者甚屬寥寥本省春收又復歉薄不得不多方籌畫免致小民有乏食之虞

臣

現經咨商閩

浙督

臣

招商給照販運臺米來浙售賣並咨商山東撫

臣

招商給照將小米雜糧等項亦由海運至浙江售賣

惟災區寬廣爲日方長恐尙無濟於事伏思粵中洋米免稅銷售向有成案聞近年來者頗多緣兩粵豐稔銷路亦滯若得此項米石由海運來浙大可接濟

臣

已咨

商兩廣督

臣

廣東撫

臣

或徑令夷商原船運至甯波通

商口岸由浙省官商分別收買或由粵省招徠內地商人給照免稅轉販來浙銷賣或竟官爲墊項委員代購扁船押運來浙由浙省解價還款統聽粵省督撫臣就近體察情形斟酌妥辦所有臣現在籌運米糧接濟民食緣由謹繕摺奏

聞伏乞

皇上聖鑒訓示謹

奏道光二十九年五月二十九日奏奉

硃批另有旨欽此

商米免稅片

再查客販糧食赴款區糶賣經過關口應蒙

恩准免稅有案合無仰懇

天恩俯念浙省被水地方較廣民食維艱准予援照成案凡有外江內河商販運米來浙銷賣者經過各關均免其納稅以輕商本而示招徠仍俟糧食充足卽行

奏明照舊辦理除咨明兩江湖廣督臣暨江蘇安徽江

西湖北湖南各撫臣及各關監督外臣謹附片具

奏伏乞

聖鑒勅下各省督撫臣轉行各關監督一體查照施行

謹

奏道光二十九年五月二十九日奏奉

硃批另有旨欽此

動碾倉穀平糶片

再臣近因外江客販運米到浙者甚屬寥寥民食堪虞業經咨商閩粵等省督撫臣招商販運來浙發糶並奏懇

天恩勅下各關免稅放行以廣招徠在案惟現在糧價日漸加增外來之米緩難濟急雖經通飭各屬勸諭富家囤戶務將存穀先行出糶而浙民素鮮蓋藏積穀無多不能平價查浙省倉儲額穀除部案動缺及清查案

內那短之外實存穀七十餘萬石察看目前情形必須
量爲發糶據藩司汪本銓議詳請

奏前來相應請

旨將浙省存貯倉穀先行動碾三十五萬石減值發糶
以資民食而平市價其動碾之穀先儘各縣倉貯如該
縣貯穀不敷再撥鄰縣總按路之遠近分別酌撥動碾
至糶價一項戶部例載歉歲米價過昂酌減不得過三
錢如必須大加酌減臨時奏

聞等語今杭嘉湖紹嚴等府所屬被水甚重災象已成
自須大加酌減應請照現在時值酌量每石減銀四錢

爲率不准再有短絀以示限制除行司飭屬遵照妥爲
辦理外

臣謹附片

奏

聞伏乞

聖鑒訓示謹

奏道光二十九年五月二十九日奏奉

硃批妥速辦理該部知道欽此

撫卹災民並籌款備賑摺

奏爲浙省被水較重之處災民乏食堪憫現由官紳捐
資及奏動庫項量予撫卹並懇

恩勅部撥款及酌留藩運一庫暨杭關銀兩以備賑項
恭摺

奏祈

聖鑒事竊照浙省地方因春夏以來雨多晴少底水過
大自閏四月十六日以後復疊遭大雨江河漫溢據杭
州嘉興湖州紹興嚴州五府所屬之海甯錢塘二十餘
州縣稟報居民宅舍以及驛路田畝汪洋一片禾苗漂
淌牆屋傾圮當經臣飭司委員分往查勘妥爲安撫並
將各屬被水情形於五月二十日恭摺

奏報在案嗣二十一二兩日復晝夜大雨至二十三

雨勢稍止時已入伏滿冀從此晴霽詎至二十五日又復傾盆如注自早至暮連綿不止被淹民房水浸愈久傾圮愈多災黎無家可歸蓬棲露宿日食無資困苦顛連深堪憫惻自應仰體

皇仁量予撫卹現在飭司委員確查將被淹最重之區實在乏食貧民先行酌量給予口糧以示體卹此項經費已飭各屬勸諭城鄉紳富量力捐資並由

臣

與司道

等捐廉支發如有不敷再由藩庫籌款湊給惟目下天氣尙未能得暢晴被淹各處田中水深二三尺至七八尺不等一時驟難涸復節候較遲補種無期災象已成

被水貧民將來勢不得不照例賑濟所費甚繁急須預
爲籌備臣與藩司悉心商議擬請將

欽差臣季芝昌奏提解京之藩運二庫存銀二十萬兩
內除藩庫存銀七萬兩現經另摺

奏明補解南河工用外餘銀十三萬兩同運庫本屆秋
撥及續徵稅課暨杭關現在徵存及本年續徵關稅均
儘數請留浙省以備賑用據藩司汪本銓將酌擬扣留
各款稟請具

奏前來臣查今歲災區寬廣情形甚重應賑戶口較多
比道光三年之災幾於倍之約計前項所留之數不敷

甚鉅亦不得不預爲籌計相應據實奏懇

天恩俯念浙省本年被水地方較廣情形較重准將

欽差

臣

季芝昌奏提解京之藩運二庫存銀十三萬兩

同運庫本屆秋撥並續徵稅課及杭關現在徵存並本年續收關稅各銀均留浙省預備災賑之用其不敷之處並請

勅下部

臣

於就近各省藩關庫內預行籌撥銀五十萬

兩委解來浙以資接濟

臣

仍飭藩司督飭各該府及印

委各員將被災之區確切查勘分別情形輕重照例核實查辦務使實惠及民不准稍有冒濫以仰副

聖主惠愛黎元至意所有現在籌辦緣由理合會同閩浙總督

臣

劉韻珂恭摺具

奏伏乞

皇上聖鑒訓示謹

奏道光二十九年五月二十九日奏奉

硃批戶部速議具奏欽此

請改撥雲南甘肅銅本兵餉片

再前准部咨於浙省二十八年地丁款內指撥雲南省庚戌年銅本銀五十萬兩又於二十九年地丁款內指撥甘肅省兵餉銀五萬兩雲南省庚戌年春季兵餉銀

二十萬兩查浙江省當年新賦錢糧厯屆上忙完數本屬無幾且通省額賦惟杭嘉湖紹四府爲多今各該府屬均被水淹勢難再事催徵至屬解二十八年地丁比較往年奏銷分數大形短絀即使續有報解亦祇能留備本省兵餉之用況本年新賦杭嘉湖紹等府額多之區災象已成將來勘明查辦或蠲或緩勢所難免此外各府額徵無多而本省歲需一切款項支用甚鉅所有前准部撥雲南甘肅二省銅本兵餉萬難兼顧據藩司汪本銓稟請

奏懇改撥前來

臣

復查無異相應請

旨勅下部

臣

將前項撥解雲南甘肅二省銅本兵餉共

銀七十五萬兩卽於別省改撥以免貽誤

臣

謹附片具

奏伏乞

聖鑒訓示謹

奏道光二十九年五月二十九日奏奉

硃批覽欽此

暫開捐賑事例摺

奏爲酌議暫開捐輸賑米事例以濟民食恭摺

奏祈

聖鑒事竊照浙省杭州嘉興湖州紹興嚴州等府所屬

地方因本年閏四月十六日以後疊遭大雨江河漲溢
民田廬舍盡被淹浸並續據甯波金華等屬亦有報五
月間雨多被淹之處臣接據各屬稟報當卽委員分赴
查勘妥爲安撫一面咨商閩粵等省督撫招商販運臺
洋等米來浙售賣免其納稅並將查辦緣由先後恭摺
具

奏在案茲查浙省被水情形旣重且廣現在暢晴旬日
高阜處所間已補插晚禾而杭嘉湖一帶低窪田地消
退甚遲田中積水尙有尺餘至數尺不等立秋已近補
種無期察看災象已成不得不預籌賑撫賑撫之款銀

米兼資民食攸關米爲尤急浙民素鮮蓋藏囤戶無多雖迭經勸諭商富出積發糶並招商採辦轉輸而日來商販甚稀市價有增無減臺洋等米來路遙遠不能尅期而至川廣兩處縱有米船因上游江安兩省均被水災難免中途截卸以現在米價核計自二兩三四錢至二兩八九錢如接濟稍遲勢必益加昂貴轉瞬辦理賑撫無米之炊殊形棘手

臣

與藩司汪本銓再三籌度計

惟有查照捐米成案酌量變通勸諭紳商捐輸米石從優獎敘以期集事查災賑定例貧民大口月給米一斗五升小口減半如給放折色每米一石合銀一兩二錢

計大口月給銀一錢八分小口九分道光三年浙省辦理災案初賑全放折色次則本折兼放最後則全放本色今以米價合銀計米一斗五升約需銀四錢五分較之例價逾倍不止如全放折色是大口一月僅得米六升小口一月僅得米三升實不足以資餬口如兼放本色是大口每月應給銀四錢有餘小口二錢有餘

國家經費有常何堪此例外支銷之舉現據該司具詳請

奏前來合無仰懇

皇上格外天恩俯准浙省暫開捐輸賑米事例一切悉

照順天捐輸新定章程給予獎敘至部定米價粳米每石合銀三兩係連腳價一切用項統計在內唯成熟之年米價平減核計尙有盈餘現逢歉歲且須由遠省採購轉運災區若不量爲加增捐輸恐難踴躍應請每石定爲三兩三錢俾廣招徠所有捐輸米石由省設局專委大員平斛驗收按數分撥仍通飭各屬儘七月內勘定災分查明實在戶口應賑米數約計本色足敷兼放卽行

奏明停捐以示限制

臣

爲籌濟民食起見謹會同閩浙

總督

臣

劉韻珂恭摺具

奏伏乞

皇上聖鑒訓示再籌辦賑撫爲期已迫

臣

一面具

奏一面卽飭司先行出示廣爲勸諭俾得早資儲備合
併陳明謹

奏道光二十九年六月十五日奏奉

硃批戶部議奏片併發欽此

暫停船工片

再浙省船工前經

臣

奏准統歸士民捐輸辦理在案現在災務緊要立待籌
捐未便再將船工同時併辦權衡緩急應將捐辦船工

之案暫行停止如各捐生內有好義急公捐銀助賑爲數較多者卽彙入捐米案內一并照順天捐輸章程援請獎敘其願捐錢文者概以二千文抵銀一兩所捐銀錢應卽分撥災區作爲賑撫之用庶多收一分捐資卽可少動一分庫帑至官紳商富各就本地量力措捐或於被水之初急籌安撫或於賑撫之外接濟錢米誼敦任卹同屬可嘉惟捐款零星不能作爲賑撫之用者應卽量爲區別仍照捐賑定例給予議敘以歸核實等情由藩司汪本銓詳請附

奏前來

臣

覆查無異理合附片具

奏伏乞

聖鑒訓示謹

奏道光二十九年五月十五日奏奉

硃批覽欽此

吳文節公遺集卷二十三目錄

奏議

米船裝帶貨物免稅片

查辦水災情形片

備賑銀數片

設法遣散游幫水手摺

籌補南糧摺

海塘石工被沖趕緊拆建摺

吳文節公遺集卷二十三

男養原謹編

奏議

米船裝帶貨物免稅片

再臣前因杭嘉湖紹嚴等府屬地方被水糧少價昂民食堪虞

奏明於閩粵等省招商販米給照免稅由海運來浙以資接濟在案茲查廣東一省尙無客商運米來浙福建臺米雖間有運到亦寥寥無幾體察情形緣海船運貨之利倍於運米故各海口商船樂於載貨而不樂於載

米目下浙省被淹之區尙未得全行涸復間有水退補種者爲時已遲能否一律長發結實尙難預卜距來年麥收之期爲日甚長而向所倚賴之川楚客米又因外江水大價昂不能源源到浙全賴閩粵兩省海船運米前來庶可接濟惟商人置造海船乘風冒險惟利是趨若非量爲變通優予體卹誠恐運米者稀無濟於事據藩司汪本銓議請援照上年江蘇省辦理海運京米章程准其酌帶貨物一體免稅以廣招徠等情詳請具奏前來合無仰懇

天恩俯念浙省民食維艱凡有客商由閩粵二省販買

米石海船運至浙江甯波乍浦口岸銷售者每船於裝運米石八成之外准其裝帶別項貨物二成一體給照免稅以廣招徠而裕民食仍俟糧食充足卽行

奏明照舊辦理除咨明閩粵督撫臣及各海關監督出

示曉諭查照辦理外臣謹附片具

奏伏乞

聖鑒敕下福建廣東督撫臣轉行各關監督一體查照施行謹

奏道光二十九年六月二十九日奏奉

硃批戶部速議具奏欽此

查辦水災情形片

再浙省自五月以來節據各屬稟報雨多被淹計共五十州縣臣以事關民瘼均隨時飭司委員分馳會勘並勸諭農民設法車戽趕緊補種至六月放晴以後高阜之區水易消退或分秧補插或改種雜糧約已十得四五臣詳加體察金華衢州等屬均可不致成災嚴州亦近上游惟因山水暴注沙石積壓多不能墾復之處甯波府屬之慈谿紹興府屬之山陰會稽蕭山諸暨等縣低窪處所水退甚遲受傷較重至杭州府屬之仁錢海甯等州縣嘉興府所屬之七縣湖州府屬之烏程歸安

德清長興武康等縣以下游頂阻宣洩不暢每日水消
僅一二寸至今田中積水尙以尺計均屬無從改種成
災多已十分較之道光三年七月成災八月水退情形
更爲弊重各災民困苦顛連實堪憫惻臣思賑撫之舉
首重戶口若僅循例查報難免濫遺卽經分飭所屬各
就各莊延請公正紳耆核實開造仍令委員及該地方
官按冊挨查將極次貧民大小口數總列一榜曉示本
莊將來散放銀米均會同紳耆辦理不准假手里保書
差以杜弊混至救貧之法尤以保富爲先前此雨勢沈
綿民情惶惑富陽武康山陰等縣竟有匪徒煽眾藉災

索擾臣以飢民在所必卹莠民在所必誅卽分遣幹員
彈壓安撫並嚴飭各縣查拏爲首棍犯俱已獲案分別
嚴行究辦其實在乏食貧民仍諄勸紳富各保各莊先
行捐資量爲周給並示以撫卹之期以是貧民安分待
恩極爲靜謐惟此次災區旣廣且距明年麥熟爲日正
長急切籌計賑撫匪特經費有常且賑卹月分例有定
限若非多集捐資何以延災黎之歲月臣於六月初間
見災象已成卽率同司道捐廉倡率用印簿頒發各府
刊刻勸捐示諭許以隨時奏懇

恩施現經各屬開報捐數仁錢兩縣得錢十餘萬串嘉

興秀水得錢二十萬串最爲踴躍目前撫卹之需就捐
款撥放外尙可留備冬春接濟此外各屬殷瘠不齊未
能截數臣已飭司核明捐項不敷之處酌動正款補給
務使一律均沾實惠至撫卹之後卽屆賑期民食急需
自應本折兼放惟倉儲短絀籌撥殊難前請暫開賑米
捐輸現尙未准部覆目下米價日益騰涌雖經臣委員
齎銀分赴湖南江西等省採買轉運而爲數無多其甯
波海口報收臺米萬石能否源源而至尙難豫料臣悉
心酌核擬於九月間散放初賑查照道光三年成案全
給折色此後展賑能否搭放本色幾成俟米捐接准部

覆再行察看情形隨時奏辦其各屬災分因有補種之
田應俟秋成勘定後由司分別詳明彙核具奏至放賑
之時臣與藩司並當先後出省親歷災區遍行查訪如
有冒濫剋扣辦理不善之州縣卽當從重嚴叅不敢徇
隱臣受

皇上叅養重恩至優極渥雖頂踵捐糜豈復有所顧惜
祇以事當艱鉅自顧菲才日夕兢兢深恐上負

委任惟有竭臣才力兼博採羣議百計圖維冀多盡一
分之心少贖一分之罪斷不敢稍有率忽自外
生成所有現在籌辦情形謹附片縷陳伏乞

聖鑒謹

奏道光二十九年七月十五日奏奉

硃批依議欽此

備賑銀數片

再臣前因浙江杭嘉湖紹嚴等府所屬地方被水情形
甚重貧民乏食

奏請

敕部撥款並酌留藩運二庫暨杭關銀兩預備賑項接
准部咨以浙省截留藩關運庫實存暨續徵並改撥等
銀已有一百餘萬兩况辦理撫卹初賑展賑次第施行

未必同時並舉所有請預撥銀五十萬兩之處擬應撥長蘆寶存鹽課銀一十萬兩山東秋撥應報地丁銀一十萬兩共銀二十萬兩仍令隨時察看情形用款盈絀核實

奏明辦理續又准咨奏明將

特旨賞給內務府銀內再行撥給浙江銀十五萬兩各等因仰維

皇上軫念災區有加無已凡屬臣民同深欽感伏查浙省現在運庫計有徵存銀十萬餘兩又南北新關現准移解徵存稅銀九萬餘兩同臣前請扣留

欽差臣季芝昌奏提解京之藩運二庫銀十三萬兩合之現准戶部兩次撥給銀三十五萬兩計共實銀六十七萬餘兩至臣前次奏請

敕部改撥之雲南甘肅二省銅本兵餉銀七十五萬兩本係在浙省二十八九年地丁欸內指撥應待各屬解完並非存司之欸前因被水後察看情形勢難徵解是以請

旨改撥並無存庫現銀截留可資賑撫是浙省現在堪爲賑撫之用者統計截留部撥兩項止實銀六十七萬餘兩並無一百餘萬兩之多至此後關運兩庫續徵之

數尙難約計災區既廣災情復重將來初賑展賑所費較鉅臣當遵照部議與藩司隨時察看情形核計用款盈絀

奏明辦理總期處處核實使經費絲毫無濫而災黎咸得生全以仰副

聖主惠愛黎元至意所有浙省現在截留暨部撥備賑實銀數目謹附片奏

聞伏乞

聖鑒謹

奏道光二十九年七月十五日奏奉

硃批戶部知道欽此

設法遣散游幫水手摺

奏爲浙省有漕各屬均被水災本屆新漕勢難一律徵收起運請

旨敕下漕

臣

督飭糧道就近於河北設法遣散游幫水

手免致聚集災區恭摺

奏祈

聖鑒事竊本年杭嘉湖等府所屬有漕地方均被水淹雖現在尙未勘定成災分數第以目前情形而論在水退過遲不能補種者固已顆粒無收卽補種之處亦因

節候較晚未能悉行暢發災情綦重本屆新漕勢難一律起運而各幫同空在即糧船水手人數眾多半非安分之輩若不預爲籌計遣散將來羣集災區不特滋事堪虞且食指浩繁竊恐米愈少而價愈貴查浙省各幫所雇水手冊造有名者每船不過八九人丁舵人等因重運笨滯難行向於額外增雇緯夫及游幫水手幫同駕駛每船約二三十人不等以通省各幫而計不下數萬人本屆浙省新漕停運必多此等水手俱係河北一帶之人若俟其歸次後再行遣散則距家遠而事較難似須於河北預行截留設法遣歸免令隨同抵次庶災

區不至聚集多人而地方悉臻綏謐相應

奏明請

旨敕下漕運總督臣就近督同浙江糧道查明浙省回空各船水手除冊造有名者飭令照舊歸次外其餘外雇及游幫水手卽於河北全行截留設法遣散不准一名過淮隨幫抵次如此辦理將該水手等可以就近還家另謀生計而回空不比重運每船有冊造額雇水手八九人可資駕駛卽將來尙有起運新漕以停運各船之水手併歸起運之船幫同撐駕亦足敷用除咨商漕臣並札飭糧道妥籌辦理外理合恭摺具

奏伏乞

皇上聖鑒訓示謹

奏道光二十九年七月三十日奏奉

硃批另有旨欽此

籌補南糧摺

奏爲杭州等府所屬被水成災南糧缺額預籌撥補以
濟支放恭摺

奏祈

聖鑒事竊照浙省滿緣各營兵米及織造匠糧向係動
支額徵南米開放每遇災緩年分缺額不敷支給歷經

奏請另籌撥補在案查杭州駐防滿營官兵織造俸銀及撫標左右二營杭協城守錢塘水師各營兵米係在杭嘉湖紹四府動撥額米解省關放又乍浦駐防滿營及織造匠糧係動支杭嘉湖三府額米又杭嘉湖三府及紹屬山會等縣編支之海防嘉協乍浦湖浦湖協太湖海甯提標定標紹協嚴協等營兵糧總計爲數甚鉅今各該府被水成災雖目前災分尙未勘定但察看情形甚重二十九年應徵銀米必蒙

恩施蠲緩卽各年未徵民欠米石亦須遞緩而應給兵匠各米均關計授要需難以缺誤自應另行酌撥查紹

屬南米係當年正月啟徵杭嘉湖三府屬南糧例係當年十月開倉隨漕並收以甲年之米作乙年支放之用啟徵既先後不同應撥米數卽多寡不一現就各項應放米石分別酌核計自本年九十月起至三十年九月止前項滿綠各營兵米及織造匠糧約需撥補正米十二萬六千餘石隨耗米一萬一千二百餘石共需正耗米十三萬七千餘石現查各屬倉穀清查案內冊報實貯七十一萬餘石前已

奏請平糶三十五萬石現僅存穀三十六萬餘石尙有歉收縣分應緩額南均須碾借且倉穀爲儲備所需亦

應酌爲留儲未便全行撥碾至本年新漕卽有可徵爲數不多儘數留抵仍恐不能敷用若發價採買則須遠赴別省匪特購運不易兼之水陸運脚所費不貲是全放本色需米較多勢難籌撥不能不量爲變通改放折色惟全改折色部定兵米折價每石止准銀一兩六錢現在市值較昂恐各兵匠不敷買食亦應量爲體卹伏思定標添設新兵米石前經議定以半本半折搭放業已咨部覆准有案此次應行撥補前項兵米匠糧應請援照成案不論滿緣官兵匠役一律以半本半折均勻搭放其應支一半折色除耗核算計米六萬三千餘石

約該折價銀十萬餘兩請於二十九年地丁項下動支其應放一半本色正米六萬三千餘石又加隨耗米五千六百餘石計共需米六萬八千六百餘石所有現貯倉穀除動碾歉緩額南之外祇可再動穀四萬石計碾放米二萬石本屆如啟徵新漕卽請儘數動撥約計米數亦不過萬石此外不敷尙多別無他款可籌竊思現准部撥四川省碾米十萬石本係運浙平糶接濟災黎且須運通歸款固未便動支別用惟民食兵糈均關緊要通盤籌畫自不能顧此失彼應請將前項兵匠不敷米石卽於川米內酌留備撥仍俟按限催徵原緩南米

遵奉部行搭運交通歸還原款似此酌籌辦理庶兵糧無虞短缺而原撥米款亦不致於無著至應蠲應緩撥抵細數容俟勘定災分另行造冊咨部查核所有搭放折色仍歸本色米內一併造銷據藩司汪本銓籌議具詳請

奏前來臣覆核無異謹會同閩浙總督臣劉韻珂恭摺具

奏伏乞

皇上聖鑒訓示謹

奏道光二十九年八月二十七日奏奉

硃批戶部議奏欽此

海塘石工被沖趕緊拆建摺

奏爲海塘石工被潮沖塌數丈經臣親詣查勘將塘後
附土設法搶護保全並未掣通進水擬卽趕緊拆建緣
由恭摺

奏祈

聖鑒事竊照浙省本年夏間雨多江水盛漲伏汛海潮
亦旺兩相沖擊沿塘柴埽各工均多潑損自七月來秋
汛潮汐尤較往年爲大塘工處處喫重經臣嚴飭該管
同知等隨時搶護加意慎防嗣於八月初九日據署西

防同知李枝青等稟報西塘所轄翁汛境內露結爲霜
金生麗玉等八號柴工及行路溝槽一百四十餘丈因
自初六七八等日潮勢洶湧且早潮甫經退平晚潮卽
跟接復至致將塘外柴薪附土盡行沖去刷成深潭內
露字號石塘根腳業已搜齧空虛塘身自面至底均有
裂縫後附戢土亦經矧陷勢甚危險等情臣因其時距
八月望汛之期爲日已迫急須先將石塘設法保護當
飭杭嘉湖道舒化民攜帶銀錢親駐工次督率該丞備
等趕緊購備麻袋裝貯泥土並多採碎石層疊拋積以
期擁護塘根無如潮勢日漸加旺十八九等日又值大

汛之期兼之東南風較大以致所拋土袋碎石經旋流
洄洑隨拋隨卽汕去查此段石塘本係乾隆年間修建
底椿黦朽致於十九日亥刻將露字接連結字號之工
被冲倒塌七丈有餘臣聞報之下飛卽親詣該處查勘
石塘已倒七丈有餘而兩頭亦形蹲踞勢甚危險臣目
擊情形萬分焦灼幸塘後附土雖已陷裂尙未掣通進
水當飭星夜集夫將附土加培堅築一面分投多購竹
簍麻袋裝載瓦礫泥土並碎石等漏夜不停先將倒塌
處所及附近各號塘根拋護完固所拋土石簍袋均須
層層積壓高出水面爲度其距塘三四丈之外水勢更

深亦須用土石拋填平淺以便趕築外護攔壩將倒卸之石塘澈底拆建方期完固除飭該道舒化民督同該同知等確切估計工料核實詳辦俟詳到另行奏辦外所有石塘被潮沖塌現已設法搶護並擬請拆建緣由理合恭摺奏

聞伏乞

皇上聖鑒訓示謹

奏道光二十九年八月二十七日奏奉

硃批覽欽此

吳文節公遺集卷二十四目錄

奏議

通籌賑卹銀數片

籌辦賑卹片

覆奏積引改抵新引摺

交代各案彙入清查片

查賑片

吳文節公遺集卷二十四

男養原謹編

奏議

通籌賑卹銀數片

再臣前因杭嘉湖紹嚴等府所屬地方被水情形甚重
貧民乏食

奏蒙

恩准截留並部撥各銀共六十七萬餘兩以備賑撫當
將實銀數目附片奏

聞並聲明遵照部議與藩司隨時察看情形核計用欸

吳文節公遺集

卷二十四

盈絀再行

奏明辦理在案茲據藩司汪本銓詳稱今歲災區較廣
飢口繁多現用撫卹雖由官紳湊捐辦理其不敷之處
亦經動

帑撥給目下各屬應給賑者卽照例分別月分動

帑開放正賑其無須給賑止須酌量撫卹一月口糧者
亦次第勸欸給發其貧戶極次口數均查照道光三年
成樣各都各村責成殷耆莊首開造由印委各員分投
挨查覈覆仍將貧戶姓名口數各就各村列榜曉示俾
共見共聞一切不假胥吏之手以杜弊端惟通盤籌計

核實摺節共需銀一百二十餘萬兩查關運兩庫截至
本年年底止約尙可續徵銀二十餘萬兩合之前次截
留部撥兩項銀六十七萬餘兩仍不敷銀三十餘萬兩
現擬於二三次賑及撫卹口糧內搭放本色米二成約
計需米十二萬餘石計可抵除銀十四萬餘兩雖現在
捐米尙止五萬餘石此後應尙有續捐之人縱或不敷
卽以糶剩之倉穀動碾湊放亦可敷用其尙有不敷賑
卹銀二十萬餘兩若再續請撥濟匪特緩不濟急且部
庫經費有常亦恐籌撥爲難再四思維應請於司庫收
存正雜各欸內除冬春兩季兵餉係屬緊欸照數酌留

備放外其餘應支之項分別緩急暫行減停先儘賑撫之用仍俟散放賑卹完竣核明所動何款及於何款內動支若干或應作正支銷或應續收歸款另行詳細咨部以憑稽核等情詳請具

奏前來

臣

復加察核均係實在情形除飭司於藩庫收

存正雜各款內酌核緩急分別留備動支湊用仍俟賑務完畢核明所動款項數目或作正支銷或續收歸款另行詳細咨部查核外所有通籌賑卹銀款毋庸再請撥濟緣由理合附片奏

聞伏乞

聖鑒謹

奏道光二十九年十月初五日奏奉

硃批戶部知道欽此

籌辦賑卹片

再浙省被災各屬勸捐賑卹並捐款不足之處由藩庫

籌欸撥補前經

臣附片具

奏欽奉

硃批依議欽此嗣據各州縣協同紳董將極次貧民分

別查報經

臣

飭司委員一再覆查確切核刪實計應賑

應撫戶口共二百數十萬均已無可再減惟時日方長

距例賑之期尙早災民嗷嗷待哺若令聚而就食易於滋事必使散而待撫始得相安因勸諭各屬遵行圖賑之法以本圖之所捐撫本圖之貧戶其捐數充裕者卽將鄰近圖分併入通融協濟貧瘠之鄉無殷戶捐資者卽於城局所收之官紳典商捐款內照數湊支或買米糶濟或徑發錢文隨民所便按月按期均由紳董自行分圖散放以歸核實至所給錢文若概照例賑每月每口給銀一錢八分合錢三百六十文需費太多勢有難繼是以各就捐款盈虛酌量減放至少者以月給二百文爲率數月以來飢黎咸資接濟其城鄉捐款俱少之

處如海甯富陽餘杭桐廬等屬約不敷銀三萬三千兩
已於藩庫備賑欸內動支給發亦按照捐撫錢數易錢
散放統俟將來賑撫事竣核計官商捐項如有餘剩卽
劃還藩庫歸欸倘不足數另行作正報銷現在各屬災
分貧戶均經勘定由臣另摺奏懇
天恩分別蠲緩賑撫被災窮黎仰沐

皇仁無虞失所據藩司汪本銓先赴災區周厯察勘民
情均屬安謐臣俟文武闡事竣再行前往復查所有各
屬捐辦賑卹並動支藩庫銀兩湊給緣由理合附片奏
聞伏乞

聖鑒謹

奏道光二十九年十月初五日奏奉

硃批戶部知道欽此

覆奏積引改抵新引摺

奏爲謹將奉查兩浙積引改抵新引緣由恭摺覆奏仰
祈

聖鑒事竊臣前次片奏請將道光二十七年以前已捆
未掣各綱舊引一律改配戊申新綱一摺經戶部以核
與前奏不符奏請

勅下確查奉

旨依議欽此抄錄原奏咨行到臣遵查戶部原奏內開
浙省前奏酌留積引六十萬道分綱帶運係專指歸補
從前庫墊及商欠之雜欸而言與戊申新綱引課毫不
相涉且所留積引奏明以二十六七兩年爲斷界限亦
自秩然何以此次又將二十七年以前已捆未掣各綱
舊引請於本年夏掣一律改配戊申新綱查戊申開綱
自有本綱應銷新引正須從此劃清趕運方可整頓若
再以舊引改配勢必又將戊申新引提出繳銷更與所
稱不致銷舊積新仍前套搭之說互有牴牾如謂改配
新綱引目卽係戊申應帶舊引歸完雜課亦必應切實

指明年分引數方與前奏相符不致轆轤且二十七年以前已捆各綱舊引既准改配新綱由場截驗赴所候掣又稱原捆各綱舊引業已在場蓋印截角未便復准捆配是同一舊引同一在場截角因何有此區分多費周折以上種種疑竇臣等詳繹再三不能明晰難保該商人等必無挪移隱混情事運司係專管鹽務之員先後兩奏俱由該司查核具詳必須聲敘清楚絕無歧異將來奏銷引課臣部方可核實勾稽應請

勅下浙江巡撫轉飭該運司詳細確查逐層登覆再由該撫覆加察核據實陳奏總期瞭如指掌勿任稍有含

混以憑核辦等因遵經飭司詳細確查逐層登覆去後
茲據運司蔡瓊詳稱遵查浙商素來疲乏雖正課年清
年欸而額引不能按綱銷足向聽各商隨時將新舊引
目參差領出持引先行赴場捆鹽運貯公所候夏冬兩
掣時由運司掣準觔重始按引納課分運至口岸銷售
自道光元年停止統引以後總係新舊套搭行運十五
年間

奏准積引改抵餘引配銷尙存十四年以前改餘積引
六十三萬餘道又截至二十七年分歷過

奏銷爲止實存各年未經領出積引二百九萬餘道本

年閏四月覆

奏兩浙鹽務情形案內聲請酌留二十六七兩年積引六十萬道歸補庫墊及有關經費之雜欸其餘積引一百四十九萬餘道全行咨部繳銷此一百四十餘萬道積引係存庫未領之引惟查有各所商人先經領出二十七年以前各年舊引陸續赴場捆鹽貯所待掣本年五月間正屆夏掣之期若仍將已捆未掣之舊引復納課運銷不惟銷舊壓新仍前套搭無以挽正新綱且於本年

奏銷新綱正課難保不因此而短絀是以具詳請

查勒限三個月解繳仍於限滿之後核其完數另行查辦如敢抗延不解卽行叅革監追抄產變抵以示懲儆至於各屬應造交冊必須遞相跟接後任冊報舊管銀數卽係前任冊報實在銀數溯查從前各任交冊雖據按任造報但其冊列銀欸多未核實現在清查案內查出徵存未解之欸悉屬從前交冊漏報之銀若令其循案查造則前任實在之數先已舛錯無可跟追若令其另行換造則本任舊管之數莫溯根原無從核準反覆籌思實多窒碍伏思交代例定造冊原爲稽查倉庫今值辦理清查各屬厯年徵解完欠業已造具四柱清冊

送部查核現復飭造分任細冊另行咨部是各屬倉庫
欸項已有清查各冊可稽卽與交代清冊無異與其循
舊飭造徒致稽延不若彙入清查俾歸簡易應請將二
十八年清查截數以前舊案交代免其另造交冊仍令
按任出具交代清算切結咨部備查至二十九年以後
新案交代現飭逐起趕算應卽以清查四柱冊內之實
在作爲新案交代之舊管悉令循案造冊如有交欸不
清或延不造冊及造報各冊仍前朦混者卽照例叅辦
以重庫項而昭核實如此則舊案交代可以悉數清釐
新案交代亦不致再行積壓據藩司汪本銓詳請具

奏前來臣覆核無異相應

奏明請

旨將現在算結各屬交代案內應交欸銀均勒限三箇月按數解繳仍於限滿之後核其完數另行查辦如敢抗延不繳卽行

奏請叅革監追抄產變抵以示懲儆並請將二十八年清查截數以前舊案交代免其另造交冊仍令按任出具交代清算切結咨部備查俾歸簡易臣謹附片具奏伏乞

聖鑒訓示謹

奏道光二十九年十一月初四日奏奉

硃批覽欽此

查賑片

再臣前經

奏明親赴災區查察賑務當卽輕騎減從由杭州省城起程前赴湖州嘉興一帶察看各屬被災地方民情均極安貼現當散放二賑之期並無以冒濫遺漏各情沿途呈訴者臣所到之處延見紳耆逐加詢問僉稱此次編查戶口領放賑銀均由地方官督同該紳等親爲經理書差里保僅供使令絕無干預所查之戶府縣各存

印冊不能意爲增除所領之銀鄉莊各貼印榜亦不能稍有侵扣臣復隨地確訪洵屬實在情形時值隆冬方殷待澤今得銀米竝放口食有資各災黎仰沐

皇仁無不同聲感頌其田間二麥播種者十之八九唯低窪田畝積水甫經消涸尙未蒔齊臣復諄飭各縣董

勸兼施現亦趕緊翻犁可期一律補種至浙西民事農田而外尤重蠶桑前因水退較遲桑根被浸日久半已就枯經臣通飭示諭嚴禁砍伐並加意培壅以養生機幸七八月以後天氣暢晴暄暖常如春日枯桑漸轉嫩葉發生海甯嘉興桐鄉等州縣並有野蠶抱繭懸綴桑

顛用以縑絲竟得善價臣前接稟報未敢遽陳今親歷
訪查知貧民採取甚多災重之區大資接濟仰賴
天心之仁愛益欽

聖澤之覃敷現在各處桑株悉已倍加壅護來春蠶事
可以無虞謹縷晰陳明上紓

塵念臣於嘉興閱兵後卽行回省於本月十八日到署
所有臣親歷災區查過賑務情形並同署日期理合附
片奏

聞伏乞

聖鑒謹

奏道光二十九年十一月二十一日奏奉

硃批覽欽此